

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԲՈՒԷՅՅԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 346, Ուրբաթ, 12 ՕԳՈՍՏՈՍ, 2016

ՀԱՅԿԱԿԱՆ

Արցախի Վերաբերեալ Ռայոնական Քննարկում՝ ՀՅԴ Բիւրոյի Կեդրոնին Մէջ

ՀՅԴ Բիւրոյի «Քրիստափոր Սիքայէլեան» կեդրոնին մէջ տեղի ունեցաւ ՀՅԴ կառոյցներու ռայոնական քննարկում, որուն նախագահեց ՀՅԴ Բիւրոյի ներկայացուցիչ Հրանդ Մարգարեան: Քննարկման մասնակցեցան ՀՅԴ Արցախի Կեդրոնական կոմիտէի անդամներ, Արցախի Հանրապետութեան Ազգային ժողովի ՀՅԴ պատգամաւորներ, ՀՅԴ Հայաստանի Գերագոյն մարմինի անդամներ, Հայաստանի Հանրապետութեան Ազգային ժողովի ՀՅԴ պատգամաւորներ, Արցախէն եւ Հայաստանէն այլ պատասխանատու ընկերներ եւ ՀՅԴ Բիւրոյի անդամներ: Քննարկուեցան արցախեան տագնապին եւ Արցախին վերաբերող այլ հարցեր:

ՀՅԴ ՄԱՍԼՈՅ ԴԻԻԱՆ

Մոսկուայի Մէջ Բարձր Մակարդակի Բանակցութիւններ՝ Նախագահներ Սարգսեանի Եւ Փութինի Միջեւ

Նախագահ Սերժ Սարգսեան Ռուսիա աշխատանքային այցելութեան ծիրին մէջ Չորեքշաբթի օր հանդիպում ունեցած է Ռուսիոյ նախագահ Վլատիմիր Փութինին հետ: Ռազմավարական գործընկեր երկու պետութիւններու ղեկավարները քննարկած են հայ-ռուսական երկկողմանի յարաբերութիւններու օրակարգին վերաբերող հարցերու լայն շրջանակ, անդրադարձած են նաեւ բոլոր ուղղութիւններով համագործակցութեան զարգացման, բարձր մակարդակով ձեռք բերուած պայմանաւորումներու իրականացման ընթացքին, եւրասիական տարածքին մէջ համարկումի հոլովոյթներու զարգացման հեռանկարին: Նախագահներ Սերժ Սարգսեան եւ Վլատիմիր Փութին քննարկած են Լեռնային Ղարաբաղի տագնապի խաղաղ լուծման հոլովոյթի ներկայ փուլին, առկայ խնդիրներուն եւ այդ հոլովոյթը յառաջ մղելու կարելիութիւններուն վերաբերող հարցեր, միտքեր փոխանակած միջազգային եւ շրջանային արդի խնդիրներու եւ մարտահրաւերներու շուրջ:

Հանդիպումին ներկայ եղած են նաեւ երկու երկիրներու պաշտօնական պատուիրակութիւններու ներկայացուցիչները:

«Յարգելի՛ Սերժ Սարգսեան, յարգելի՛ բարեկամներ, շատ հաճելի է բոլորդ Մոսկուայի մէջ տեսնել: Հայաստանը մեզի համար ռազմավարական գործընկեր է Անդրկովկասի մէջ, եւ մենք հետեւողականօրէն կը կառուցենք դաշնակցային յարաբերութիւններ, նաեւ՝ բոլոր ամենէն զգայուն ուղղութիւններով եւ միջազգային հարթակին վրայ: Նկատի ունիմ նախ եւ առաջ ԱՊՀ տարածքը. մենք այստեղ կը համագործակցինք եւ ՀԱՊԿ, եւ այժմ արդէն Եւրասիական միութիւն շրջագիծին մէջ: Ի դէպ, ինձի համար շատ հաճելի է արձանագրել եւ կ'ուզեմ ձեզ

շնորհաւորել այդ առիթով, եւ սերտած եմ անցեալ տարուան տուեալները՝ Երասխական տնտեսութեան մէջ Հայաստանի անդամակցութենէն ետք համախառն ներքին արդիւնքը ձեր մօտ աճած է 10 առ հարիւրով, ինչպէս կ'երեւի փաստաթուղթերէն: Ատիկա, վստահաբար, շատ դրական ցուցանիշ է: Յոյս ունիմ, որ այս դրական աշխուժութիւնը կը շարունակուի: Մենք ունինք նաեւ երկկողմանի բնոյթի բազմաթիւ այլ հարցեր: Այդ իսկ պատճառով եւ շատ ուրախ եմ ձեզ տեսնելով: Բարի եկած էք», նախագահ Սերժ Սարգսեանի հետ հանդիպումին ըսած է Ռուսիոյ նախագահ Վլատիմիր Փութին:

«Շնորհակալութի՛ն, Վլատիմիր Փութին: Ես շատ ուրախ եմ մեր հերթական հանդիպման համար, եւ աւանդաբար այնպէս կը պատահի, որ տարուան այս նոյն ժամանակաշրջանին կը հանդիպինք՝ քննարկելու հայ-ռուսական գործընկերութեան վիճակը, երկկողմանի եւ շրջանային օրակարգի աւելի արդիական հարցերու շուրջ միտքեր փոխանակելու եւ, վստահաբար, քննարկելու նախկին շրջաններուն մեր ձեռք բերած պայմանաւորուածութիւններուն իրականացման ընթացքը: Ես գոհունակութեամբ կ'ուզեմ փաստել, որ հակառակ համաշխարհային եւ շրջանային տնտեսական խնդիրներուն, վեց ամսուան ընթացքին մեր առեւտրական շրջանառութիւնը աճած է 12 առ հարիւրով, իսկ Հայաստանէն Ռուսիա արտահանումը աճած է գրեթէ 90 առ հարիւրով եւ, փաստօրէն, հասած է կիսամեակի ընթացքին իր պատմական առաւելագոյնին: Ատիկա, վստահաբար, նաեւ Երասխական տնտեսական միութեան կողմէ տրամադրուող կարելիութիւններուն շնորհիւ է, ինչ որ, անշուշտ, շատ լաւ է: Այս ժամանակաշրջանին, վստահաբար, տեղի ունեցած են բարձրաստիճան պաշտօնատար անձերու աշխուժ փոխադարձ այցելութիւններ: Եւ, սկզբունքօրէն, մենք չունինք որեւէ լուրջ խնդիր երկկողմանի յարաբերութիւններուն մէջ, բոլոր հարցերը արդիւնաւէտ ձեւով կը լուծուին: Ես կ'ուզեմ անձնական երախտագիտութիւնս յայտնել ձեզի՝ Լեոնային Ղարաբաղի տագնապի դիւանագիտական ճամբով լուծման գործին մէջ Ռուսիոյ կողմէ ներդրուող ջանքերուն համար: Եւ վստահաբար, այստեղ շատ եւ շատ կարեւոր է, որ իրականացուին ձեռք բերուած պայմանաւորուածութիւնները: Մենք պատրաստ ենք ասոր: Շնորհակալութիւն ձեզի այս հանդիպումին համար, շատ հաճելի է», ըսած է նախագահ Սերժ Սարգսեան:

Ռուսիոյ նախագահը աւելցուցած է, որ հաճոյքով կը տեղեկացնէ նախագահ Սերժ Սարգսեանին Ազրայէճանի նախագահին հետ Պաքուի մէջ տեղի ունեցած հանդիպման ընթացքին Լեոնային Ղարաբաղի տագնապին շուրջ գրոյցի արդիւնքներուն մասին:

Հանդիպումին աւարտին նախագահներ Սերժ Սարգսեան եւ Վլատիմիր Փութին լրատուամիջոցներուն առջեւ հանդէս եկան բանակցութիւններու արդիւնքները ամփոփող յայտարարութիւններով:

Նախագահ Սերժ Սարգսեանի Յայտարարութիւնը Լրատուամիջոցներուն Առջեւ՝

Ռուսիոյ Նախագահ Վլատիմիր Փութինի Հետ Հանդիպման Վերաբերեալ

Երկկողմանի հանդիպումէն անմիջապէս ետք նախագահներ Սարգսեան եւ Փութին տուին մամլոյ ասուլիս մը, որուն շրջագիծին մէջ նախագահ Սարգսեան կարդաց հետեւեալ յայտարարութիւնը.

«Յարգելի՛ տիկնայք եւ պարոնայք,

Նախ եւ առաջ կ'ուզեմ շնորհակալութիւն յայտնել Ռուսիոյ նախագահ Վլատիմիր Փութինին՝ ջերմ հիւրընկալութեան համար: Բարձր մակարդակի քաղաքական աշխուժ երկխօսութիւնը կը համապատասխանէ մեր երկիրներուն միջեւ յարաբերութիւններու մակարդակին: Այդ յարաբերութիւնները կ'ընդգրկեն մեր պետութիւններու կենսագործունէութեան բոլոր մարզերը՝ սկսած ՀԱՊԿ-ի ուղղութեամբ դաշնակցային գործընկերութենէն մինչեւ տնտեսական համարկում Եւրասիական տնտեսական միութեան ծիրին մէջ եւ սերտ համագործակցութիւն մարդասիրական մարզին մէջ: Մեր շրջաններուն միջեւ կապերու ծիրը կ'ընդարձակուի, եւ այդ առումով մեծ դեր կը խաղան պարբերական դարձած



միջշրջանային հայ-ռուսական համաժողովները, Ռուսիոյ կառոյցներուն եւ Հայաստանի մարզերուն միջեւ ուղիղ կապերը: Մենք բարձր կը գնահատենք Ռուսիոյ դերը աշխարհին եւ յատկապէս շրջանին մէջ, ուր զուգահեռ կ'ընթանան կայունութեան եւ անվտանգութեան վրայ ազդող բազմաթիւ հոլովոյթներ: Հայաստանի մէջ ուշադիր կերպով կը հետեւէին վերջին շարքուան ընթացքին Ռուսիոյ նախագահին արտաքին եռանդուն քաղաքական յարաբերութիւններուն, որոնք լիովին հասկնալի են՝ նկատի առնելով այն, որ Ազրպէյճանը, Իրանը եւ Թուրքիան Հայաստանի սահմանակից պետութիւններ են: Ես շնորհակալ եմ Ռուսիոյ նախագահին այդ հանդիպումներուն ընթացքին մասին մանրամասն տեղեկատուութեան համար եւ համոզուած եմ, որ Հայաստանը միայն պիտի շահի մեր շրջանին մէջ Ռուսիոյ գործօն դերակատարութենէն: Մենք այսօր քննարկեցինք նաեւ Հայաստանի եւ Ռուսիոյ միջեւ առեւտրական շրջանառութեան աճի էական յաջողութիւնները: Ատիկա ուղղակի պատասխան է այն թերահաւատներուն, որոնք կը կանխագուշակէին, որ Եւրասիական տնտեսական միութեան Հայաստանի անդամակցութիւնը ոչ մէկ առաւելութիւն պիտի տայ Հայաստանին: Կը բաւէ նշել, որ հակառակ միջազգային բոլոր դժուարութիւններուն եւ խոչընդոտներուն, մեր առեւտրաշրջանառութիւնը մեծապէս աւելցած է, իսկ Հայաստանէն Ռուսիա արտածումը ընթացիկ տարուան առաջին վեց ամիսներուն աւելցած է գրեթէ 90 առ հարիւրով՝ մէկ կիսամեակին հասնելով իր պատմական առաւելագոյն սահմանին: Համոզուած եմ, որ մենք պիտի կարենանք պահպանել եւ զարգացնել այդ աշխուժութիւնը, քանի որ մեր երկիրներու միջեւ առկայ առեւտրատնտեսական ներուժը նոյնիսկ այսօր լիարժէք կերպով չ'օգտագործուիր:

Բնականաբար, մեր այսօրուան բանակցութիւններուն գլխաւոր նիւթը Լեռնային Ղարաբաղի տագնապի խաղաղ լուծման հարցն էր, Վիեննայի եւ Ս. Փեթերսպուրկի վեհաժողովներուն ձեռք բերուած պայմանաւորութիւններու կատարման ընթացքը: Ատիկա, նախ եւ առաջ, 1994-1995 թուականներու զինադադարի դրութեան մասին եռակողմանի անժամկէտ համաձայնագիրներու անվերապահ կատարումն է, միջադէպերու հետաքննութեան մեքանիզմներու ստեղծումը եւ ԵԱՀԿ-ի գործող նախագահի անձնական ներկայացուցիչի առաքելութեան ընդլայնումը: Ես անգամ մը եւս շնորհակալութիւն կը յայտնեմ Ռուսիոյ նախագահին՝ այն ջանքերուն համար, զորս, իբրեւ ԵԱՀԿ-ի Մինսքի խմբակի համանախագահ երկիր, Միացեալ Նահանգներու ու Ֆրանսայի հետ համագործակցութեամբ, ի գործ կը դնէ Ռուսիան՝ տագնապի խաղաղ լուծման եւ այդ գործընթացին մէջ նախագահ Փութինի անձնական ներդրումին համար: Տակաւին երկու տարի առաջ Սոչիի մէջ մենք մանրամասն կերպով քննարկած ենք այս բարդ հարցի լուծման հիմնական սկզբունքներն ու մօտեցումները: Այդ սկզբունքները անփոփոխ են: Նման տագնապ անկարելի է լուծել՝ յղում կատարելով

հետևանքներուն, եւ ոչ թէ պատճառներու վերացման: Ղարաբաղեան հարցին էութիւնը Ղարաբաղի ժողովուրդին պայքարն է՝ ինքնորոշման համար: Ասիկա բոլոր ժողովուրդներուն անքակտելի իրաւունքն է: Տագնապի լուծումը այդ իրաւունքի յարգումն ու ապահովումն է: Ճիշդ այդ մասին է, որ այսօր մենք մանրամասնօրէն գրուցած ենք Ռուսիոյ նախագահին հետ: Նման զգայուն նիւթի մը առնչուող խաղաղ հոլովոյթը եւ բանակցութիւնները երբեք դիւրին չեն ըլլար: Բոլոր այն փորձերը, որոնց իբրեւ հետեւանք կրնայ խախտիլ ուժերու հաւասարակշռութիւնը, յառաջանալ յաղթողներ ու պարտուողներ, դատապարտուած են ձախողութեան եւ նոր լարուածութեան: Պէտք է բոլորը շահին իբրեւ արդիւնք իրատեսական, յստակ եւ իրագործուող որոշումներու, որոնք հիմնուած պիտի ըլլան փոխադարձ յարգանքի եւ վստահութեան, եւ ոչ թէ ատելութեան ու այլատեսացութեան վրայ: Վլատիմիր Փութին, խաղաղութեան եւ համերաշխութեան նիւթերը յատկապէս արդիական են ողիմպիական խաղերու օրերուն: Մենք անգամ մը եւս յաջողութիւն կը մաղթենք Ռուսիոյ եւ Հայաստանի հաւաքականներուն եւ կը փափաքինք միասին ուրախանալ մեր եւ ձեր մարզիկներուն նուաճած յաջողութիւններով: Մենք շատ հպարտ ենք, որ հայկական ծագում ունեցող ռուս մարզիկները հասած են շատ լաւ արդիւնքներու: Քանի մը ամիս առաջ Երեւանի մէջ բացուած կատարուեցաւ համաշխարհային գեղասահքի առասպել Իրինա Ռոտնինայի անուան դպրոցին: Համոզուած եմ, որ մարզական միացեալ յաղթանակները եւ նուաճումները լիովին կ'արտացոլան մեր ժողովուրդներուն փոխադարձ զգացումներուն մէջ: Ինչպէս կ'ըսեն՝ առողջ հոգի առողջ մարմինի մէջ»:

Լուծարուած Է Ազգային Անվտանգութեան Խորհուրդի Աշխատակազմը Եւ Ստեղծուած Ազգային Անվտանգութեան Խորհուրդի Քարտուղարութիւն



Հայաստանի նախագահ Սերժ Սարգսեան 10 Օգոստոսին ստորագրած է հրաման մը՝ «Ազգային անվտանգութեան խորհուրդի աշխատակազմ» պետական կառավարչական հիմնարկը լուծարելու եւ Հայաստանի Հանրապետութեան նախագահի 25 Օգոստոս 2008-ի հրամանին ուժը կորսնցուցած նկատելու վերաբերող: Հրամանով Հայաստանի նախագահի աշխատակազմի ղեկավարին եւ Ազգային անվտանգութեան խորհուրդի քարտուղարին կը

յանձնարարուի մինչեւ 1 Սեպտեմբեր նախագահին հաստատման ներկայացնել Ազգային անվտանգութեան խորհուրդի քարտուղարութեան կանոնադրութիւնը եւ կառուցուածքը՝ Հայաստանի նախագահին յարակից այլ իրաւական նախագիծերու հետ միասին:

Հայաստանի նախագահը ստորագրած է այլ հրամանագիր մը 17 Օգոստոս 2007-ի ՆԽ-193 հրամանագիրին մէջ փոփոխութիւն եւ լրացումներ կատարելու մասին՝ նպատակ ունենալով երկրի ներքին եւ արտաքին անվտանգութեան արդի մարտահրաւերներուն համընթաց արագ, արդիւնաւէտ եւ համակարգուած արձագանգման համար բարձրացնելու Ազգային անվտանգութեան խորհուրդի դերը, ինչպէս նաեւ անցում կատարելու խորհրդակցական մարմինի կարգավիճակէն դէպի որոշումներ կայացնող մարմինի կարգավիճակին: Այս հրամանագիրով նախագահի աշխատակազմի կանոնադրութեան մէջ յաւելումներ եւ ամփոփումներ կը կատարուին, որպէսզի հիմնականօրէն Ազգային անվտանգութեան խորհուրդի քարտուղարութիւն ստեղծուի եւ անոր ղեկավարը գործէ Ազգային անվտանգութեան խորհուրդի քարտուղարի անմիջական ղեկավարութեամբ:

Փայլան. «Հայերը Վախի Մէջ Կ'ապրին Թուրքիոյ Պետական Յեղաշրջման Փորձէն Ետք»



Թուրքիոյ քրտամէտ ժողովուրդներու ժողովրդավարական կուսակցութեան հայազգի երեսփոխան Կարօ Փայլանի հետ «Թերթ»-ը հարցազրոյց մը կատարած է 15 յուլիսին Թուրքիոյ մէջ տեղի ունեցած պետական յեղաշրջման փորձի տապալումէն ետք տիրող իրավիճակին մասին:

Փայլան ըսած է, որ Թուրքիոյ մէջ ապրող ազգային փոքրամասնութիւնները եւ ընդդիմադիր նկատուող մարդիկ վախի մէջ կ'ապրին, քանի որ կը հալածուին թրքական իշխանութիւններուն կողմէ: Ան յիշած է օրինակը Պոլսոյ քաղաքապետարանի Արուեստի եւ մասնագիտական կրթութեան կեդրոնին մէջ դասաւանդող հայազգի Արի Հերկելին, որ պաշտօնազրկուած էր վերջերս՝ Կիլիկիոյ շարժումին հետ կապեր ունենալու ամբաստանութեամբ:

«Այս մթնոլորտին մէջ հայերը բնականաբար վախով կ'ապրին», ըսած է Փայլան:

Ան նշած է, թէ իր կուսակցութեան ղեկավարութիւնը քանի մը անգամ փորձած է կապ հաստատել Էրտողանի եւ այլ կուսակցութիւններու հետ, բայց Էրտողան մերժած է քրտամէտ կուսակցութեան հետ հանդիպիլ: «Այս կը նշանակէ, թէ անոնք (իշխանութիւնները) դասեր չեն քաղած յեղաշրջումի փորձէն», աւելցուցած է ան:

«Իշխանութեանց այս մօտեցումը ապագային նկատմամբ յուսատու չէ, որովհետեւ թուրքերը լաւ յարաբերութիւններու մէջ չեն հայերու, քիւրտերու եւ այլ ազգային փոքրամասնութիւններու հետ: Այս կը նշանակէ, թէ ազգայնական եւ Էրտողանի բռնատիրական մօտեցումը տիրապետող պիտի ըլլայ պետութեան մէջ», ըսած է Փայլան:

Ան նաեւ յայտնած է, թէ դատարանը տակաւին չէ պատասխանած թուրք ազգայնամոլներուն դէմ իր բացած դատին կապակցութեամբ:

Յիշեցնենք, որ Գերմանիոյ խորհրդարանին կողմէ Հայոց ցեղասպանութիւնը ճանչցող բանաձեւին վաւերացումէն անմիջապէս ետք, ազգայնամոլները ցոյց կազմակերպած էին Պոլսոյ մօտ Գերմանիոյ հիւպատոսարանին դիմաց՝ պոռալով. «Լաւագոյն հայը մեռա՛ծ հայն է»:

Պատասխանելով ռուս-թրքական յարաբերութիւններուն մասին հարցումի մը՝ Փայլան ըսած է, որ Թուրքիա Ռուսիոյ հետ իր յարաբերութիւնները կը բարելաւէ, որպէսզի Արեւմուտքին ցոյց տայ, թէ ունի այլընտրանքներ, յատկապէս այն միջոցին, երբ Էրտողան Արեւմուտքի մէջ անբաղձալի տարր մը դարձած է:

Միւս կողմէ, «Էրմենիհապեր» կը հաղորդէ, թէ Փայլան պոլսահայ այլախոհ լրագրող Հայկօ Պաղտատի անձնագիրը առանց հիմնաւորումի գրաւելու փաստին առնչութեամբ գրաւոր դիմում ներկայացուցած է ներքին գործոց նախարարութեան:

Պաղտատի անձնագիրը գրաւուած էր անոր Պոլիս վերադարձին, Աթաթիւրքի անուան օդակայանին մէջ:

Օհանեան. «Միակողմանի Ձիջումներու Մասին Կարելի Չէ Խօսիլ»



Հայաստանի պաշտպանութեան նախարար Սէրժան Օհանեան՝ անդրադառնալով 10 Օգոստոսին Մոսկուայի մէջ տեղի ունենալիք Ռուսիոյ նախագահ Վլատիմիր Փութինի եւ Հայաստանի նախագահ Սերժ Սարգսեանի միջեւ հանդիպման՝ ըսած է, թէ Հայաստանի ռազմաքաղաքական ղեկավարութեան նպատակը Լեռնային Ղարաբաղի ինքնորոշումը եւ անկախութիւնը ապահովելն է:

Ներկայացնելով Հայաստանի սկզբունքային դիրքորոշումը՝ նախարարը ըսած է, որ միակողմանի զիջումներու մասին կարելի չէ խօսիլ. «Փաստ է, որ Լեռնային Ղարաբաղի տագնապի խաղաղ լուծման ծիրին մէջ բանակցային հոլովոյթի աշխուժացում կը տեսնենք, եւ այդ աշխուժացման մէջ ԵԱՀԿ Մինսքի խմբակի համանախագահ երկիրները, Ռուսիոյ նախաձեռնութեամբ այսօր աշխատանք կը կատարեն, որ Լեռնային Ղարաբաղի տագնապը լուծուի միայն ու միայն խաղաղ եւ քաղաքական ճամբով: Մենք ամէն ինչ պէտք է ընենք, որ իրականութեան մէջ այն նպատակը, որ մենք այսօր ունինք՝ Լեռնային Ղարաբաղի Հանրապետութեան ինքնորոշումը, ազատ, անկախ ապրիլը Հայաստանի Հանրապետութեան հետ լայն համագործակցութեան եւ լայն կապի ծիրին մէջ ապրիլը... որպէսզի այդ նպատակին մենք կարենանք հասնիլ: Ես միշտ ըսած եմ եւ այսօր ալ կ'ըսեմ, որ Լեռնային Ղարաբաղի Հանրապետութեան վտանգի ենթարկուելու պայմաններուն մէջ, այսինքն յարձակումներու անգամ մը եւս սանձազերծման պայմաններուն մէջ, եւ պաշտպանութեան բանակը, եւ համագործակցութեան ծիրին մէջ հայկական բանակը ամէն ինչ պիտի ընեն, որ Ղարաբաղի իրաքանչիւր թիզ հողը պաշտպանուի»:

Օհանեան նաեւ ըսած է, որ Ռուսիոյ կողմէ տրուած 200 միլիոն տոլար վարկի ծիրին մէջ բոլոր համաձայնագիրները ռուսական կողմին հետ կնքուած են, եւ զէնքի Հայաստան մատակարարումը արդէն սկսած է՝ առանց, սակայն, մանրամասնելու, թէ ինչ զինատեսակներու կը վերաբերի ասիկա:

Նշելով, որ քառօրեայ մարտական գործողութիւնները եղած են Լեռնային Ղարաբաղի Հանրապետութեան տարածքին մէջ, անոնք շատ կարճ տեւած են, Ռուսիոյ նախաձեռնութեամբ կատարուած է ամէն ինչ, որպէսզի այդ մարտական գործողութիւնները կանգ առնեն ու չշարունակուին: «Եւ ասոր շարունակութիւնն է, որ այսօր բանակցային հոլովոյթը աշխուժացած է՝ խաղաղ, քաղաքական ճամբով լուծման համար», եզրափակած է Հայաստանի պաշտպանութեան նախարարը:

**«Քառօրեայ Պատերազմէն Համապատասխան
Եզրայանգումներ Կատարուած Են»**

Հայաստանի Հանրապետության պաշտպանության նախարար Մեյրան Օհանեան այցելած է Հայաստանի հիւսիսարեւելեան սահմանագոտիին մէջ գտնուող զօրամաս եւ դիրքեր. զօրամասին մէջ նախարարին եւ ներկաներուն ներկայացուած է ռազմական ցուցադրութիւն, որուն ընթացքին զինուորները յարձակում գործած են պայմանական թշնամիին վրայ եւ չեզոքացուցած զայն:

Անկէ ետք նախարարը ողջունած է զինուորները, ներկաները, այնուհետեւ պարգևատրած ցուցադրութեան մասնակից զինուորները:

«Պատիւ ունիմ հաշուետուութիւն ներկայացնելու առաջնագիծին վրայ հայոց բանակին, հրամանատարներուն եւ զինուորներուն հետ միասին: Զինուորներ, որոնք զօր ու գիշեր սահմաններուն կանգնած կը պաշտպանեն Հայաստանի եւ Լեռնային Ղարաբաղի անվտանգութիւնը: 2016-ին մենք առաջնորդուած ենք «Պատրաստուած հրամանատար, արհեստավարժ բանակ, ապահով հայրենիք» կարգախօսով եւ տարին յայտարարած հրամանատարական պատրաստութեան տարի, ինչ որ կը նշանակէ, թէ շեշտը պիտի դրուի հրամանատարներու գիտելիքներու, հմտութիւններու եւ ունակութիւններու կատարելագործման վրայ, որոնք պիտի ապահովեն Հայաստանի զինուած ուժերու ընդհանուր զարգացումն ու յառաջընթացը: Թէկուզ առաջին կիսամեակը եղած է չափազանց լարուած եւ դժուար, այնուամենայնիւ, զինուած ուժերը իրենց առջեւ դրուած խնդիրը պատուով կատարած են: Մենք նախ եւ առաջ սահմաններու պաշտպանութեան, մարտական հերթափոխի իրականացումով ապահոված ենք հայ ժողովուրդին անդորրը», յայտնած է ան:

Մեյրան Օհանեան զինուորական գործողութիւններուն ընթացքին յաղթանակ ապահովելու իմաստով կարելոր նկատած է երկու հանգամանք՝ զինուորի պատրաստուածութիւնը եւ սպառազինութիւնն ու ռազմական համակարգը: Ան ընդգծած է, թէ, խօսելով զինուորին մասին, պէտք է շեշտել ընդհանուր մարդուժի կառավարման համակարգի ձեւաւորումը, ինչ որ առաջնահերթ է Հայաստանի զինուած ուժերուն մէջ: Նախարարին համաձայն, կարելորագոյն խնդիրը կը շարունակէ մնալ համալրումը: Օհանեան շեշտած է, որ քայլերու ձեռնարկուած է կրթութեան բարձր մակարդակ ապահովելու ուղղութեամբ:

Ս. Օհանեան ընդգծած է նաեւ, որ քառօրեայ պատերազմի վերլուծութենէն կարելի է կատարել շարք մը կարելոր եզրայանգումներ: «Մենք վեր հանեցինք այն բոլոր դրական կողմերը, որոնք հիմք հանդիսացած են յաջողութիւններու եւ յաղթանակներու համար եւ, վստահաբար, համապատասխան հետեւութիւններ կատարուած են նաեւ բացթողումներու եւ լրացումներու վերաբերեալ: Այդ ամէնը հաշուի առնելով՝ ուսումնական հոլովոյթի բոլոր փուլերուն ընթացքին ուշադրութիւն դարձուցած ենք քառօրեայ պատերազմին տեղի ունեցած դրական արդիւնքներուն վրայ եւ հասած ենք այն եզրակացութեան, որ վերջին տարիներուն զինուած ուժերու զինուորական ծրագիրը ամբողջութեամբ կը գործէ»:

Օհանեան շեշտած է, որ մեծ դեր ունի նաեւ սպառազինութեան եւ զինուորական համակարգի վիճակը, անոնց նկատմամբ հոգատար վերաբերմունքը, շահագործման բարձր մակարդակը, որ թոյլ կու տայ տարբեր փուլերու ընթացքին կատարել պաշտպանութեան բանակին առջեւ դրուած բոլոր խնդիրները: «Վստահաբար, հաշուի առնելով թոյլ տրուած սխալները՝ մենք իրականացուցած ենք տարբեր տեսակի ռազմափորձեր եւ մարզումներ, որոնց հիմքը եղած է նոր մարտավարութեան, գործողութիւններու նոր ձեւերու, մարտակարգերու ձեւաւորման հարցը», նշած է ան:

ՄԻՋԱԶԳԱՅԻՆ

Անգարայի Մէջ Չեն Բացառեր Քսաններու Վեհաժողովի Ծիրին Մէջ Փուրթին-Էրտողան Հանդիպում Մը

«ՌԻԱ Նովոսթի» կը հաղորդէ, որ Ռուսիոյ մէջ Թուրքիոյ դեսպան Իւմիթ Եարտըմ յայտնած է, որ Ռուսիոյ նախագահ Վլատիմիր Փուրթինի եւ Թուրքիոյ նախագահ Ռեճեփ Թայիփ Էրտողանի միջեւ՝ Սեպտեմբերին Չինաստանի մէջ Քսաններու խմբակի ղեկավարներու վեհաժողովին ծիրին մէջ հանդիպում մը հաւանական է:

«Որովհետեւ այս հարցը նախապէս մշակուած է, եւ չեմ բացառեր այդպիսի հանդիպումի մը կայացման հաւանականութիւնը», ըսած է թուրք դիւանագետը:

Ռուսիոյ մէջ Թուրքիոյ դեսպանը նաեւ յայտարարեց, որ ՕԹԱՆ իրաւունք չունի ճշդելու Անգարայի հաստատելիք յարաբերութիւնները:

Ան նաեւ յայտնեց, որ Անգարա եւ Մոսկուա համաձայնած են Սուրիոյ հարցին շուրջ իրենց հաղորդակցութիւնները աշխուժացնելու:

Պայթումներ՝ Թուրքիոյ Մարտին Շրջանին Մէջ

Չորեքշաբթի օր թրքական Մարտին նահանգի հիւանդանոցին մօտ տեղի ունեցած է պայթում մը. մահացած է առնուազն 6 բնակիչ եւ արձանագրուած է 50 վիրաւոր:

Աւելի կանուխ հաղորդուած էր, որ երկրի հարաւարեւելեան շրջանին մէջ ոստիկանական ինքնաշարժ մը պայթած է:

«Ռուսիոյ Հետ Աշխատանք Կը Տանինք Սուրիոյ Հարցով Աշխատանքի Ուժեղ Մեքանիզմ Ստեղծելու Ուղղութեամբ» Ըսաւ Չաոււշօղլու

Թուրքիոյ արտաքին գործոց նախարար Մելլութ Չաոււշօղլու յայտնեց. «Թուրքիա Ռուսիոյ հետ աշխատանք կը տանի Սուրիոյ հարցով աշխատանքի ուժեղ մեքանիզմ ստեղծելու ուղղութեամբ»՝ նշելով, որ Թուրքիան Սուրիոյ մէջ մարդասիրական օժանդակութիւններու եւ զինադուլի հարցով Ռուսիոյ ունեցած պատկերացումին նմանը ունի:

Թրքական դիւանագիտութեան պետը յայտնեց, որ Ռուսիոյ հետ համաձայնութիւն գոյացած է Սուրիոյ տագնապին քաղաքական լուծում գտնելու կարելորութեան վերաբերեալ:

Չաոււշօղլու ըսաւ, որ Ռուսիոյ նախագահ Վլատիմիր Փուրթին յայտարարած է, որ պիտի ջնջէ թրքական սննդամթերքին դէմ հաստատուած արգելքները եւ թուրք գործարարներուն վերաբերող պատժամիջոցները՝ նշելով, որ հսկայական ծրագիրներու համար Ռուսիոյ հետ միացեալ սնտուկի մը հաստատման համաձայնութիւնը գոյացած է:

Թուրքիոյ նախագահի բանբեր Իպրահիմ Քալըն Չորեքշաբթի օր յայտարարեց, որ «Սուրիոյ տագնապին հարցով Սուրիոյ նախագահ Պաշշար Ասատի հեռացման նկատմամբ մեր կեցուածքը չէ փոխուած»՝ աւելցնելով. «Ռուսիոյ հետ համաձայնութիւն գոյացուցինք ՏԱՀԵՇ-ի եւ քրտական միլիսներուն դէմ պայքարելու»:

Մինչ այդ, ՄԱՆԱ լրատու գործակալութիւնը հաղորդեց, որ Սուրիոյ պաշտպանութեան նախարար գոր. Ֆահտ Ժասեմ Ֆրէյժ, Չորեքշաբթի օր Սուրիոյ նախագահ Պաշշար Ասատի յանձնարարութեամբ ստուգելէ ետք Հալէպը պաշտպանող սուրիական ուժերու մարտական պատրաստութիւնը, յայտարարած է, որ սուրիական բանակի հրամանատարութիւնը «լի է վճռականութեամբ՝ կատարելու Հալէպ քաղաքի անվտանգութեան ապահովման խնդիրը»:

«Սուրիոյ բոլոր զաւակները յոյսով ու վստահութեամբ կը հետեւին փառապանծ զօրքերուն, որոնք կը մարտնչին Հալէպի պատերուն մօտ», ըսած է Ֆրէյժ:

Ըստ անոր, «ահաբեկիչներու յելուգակախումբերը պիտի ջախջախուին, եւ անոնց ծրագիրները պիտի ձախտդին»:

Ուաշինկթըն Կ'ողջունէ, Իսկ Տը Միսթուրա Ոչ Բաւարար Կը Նկատէ Հալէպի Մէջ Ռուսիոյ Հաստատած Զինադադարը



Միացեալ Նահանգներու արտաքին գործոց նախարարութեան բանբեր Էլիզապեթ թրիսո՝ մեկնաբանելով Հալէպի մէջ Ռուսիոյ հաստատած օրական երեք ժամուան զինադադարը, յայտնեց, որ Ուաշինկթըն կ'ողջունէ որեւէ զինադադար, որ կրնայ օգնել կենսական մարդասիրական օժանդակութիւններու մատակարարման, «սակայն գայն պէտք է յարգեն բոլոր կողմերը»:

Նշենք, որ ռուսական բանակի սպայակոյտի զինուորական գործողութեանց բաժանմունքի ղեկավար գոր. Սերկէյ Ռուսսքոյ յայտարարեց, որ հինգշաբթի (Չորեքշաբթի օր, «Ա.») օրուրնէ սկսեալ Հալէպի մէջ պիտի հաստատուի օրական երեք ժամուան զինադադար՝ մարդասիրական օժանդակութիւն մատակարարելու համար:

Սակայն Սուրիոյ հարցով ՄԱԿ-ի յատուկ պատուիրակ Սթեֆան տը Միսթուրա նշեց, որ Հալէպի մէջ Ռուսիոյ յայտարարած 3 ժամուան զինադադարը բաւարար չէ, եւ մարդասիրական օժանդակութիւն մատակարարելու համար զինադադարը պէտք է ըլլայ 48 ժամ տևողութեամբ:


Տը Միսթուրա ըսաւ. «Զինուորական լուծումը Սուրիոյ կամ Հալէպի հարցը պիտի չլուծէ»՝ աւելցնելով, որ տագնապին երկու կողմերուն վրայ գտնուող քաղաքայիններն ալ շրջափակման եւ զինուորական բախումներուն պատճառով կը վտանգուին:

Միւս կողմէ, Ռուսիոյ պաշտպանութեան նախարարութիւնը յայտարարեց, որ Հալէպի վերջին բախումներուն ընթացքին զինեալ խմբաւորումներուն կրած կորուստները հասած են 1000 զոհի եւ 2000 վիրաւորի:

ԱԿՆԱՐԿ

Մերի Տրամաբանությունը Գերիշխող՝ Ներկայ Աշխարհաքաղաքական Գործընթացներուն Մէջ

Մերը մեզի համար համազգային պահանջատիրութեան իրաւական հիմքն է, որ պայմանականօրէն զուգորդուած է Միացեալ Հայաստանի սահմանները ճշդաձ Ուիլսընի իրաւարար վճիռին հետ: Մերի պայմանագիրին եւ Ուիլսընի իրաւարար վճիռին այժմեական հնչեղութիւն ունեցած ըլլալուն մասին յայտարարած էր նախագահ Սարգսեան ոչ միայն Ուիլսընի շիրիմին իր տուած այցելութեամբ, այլ ուղղակի նաեւ իրաւարար վճիռի կայացման իննսունամեակին առիթով՝ յայտարարելով, որ պայմանագիրն ու վճիռը կը ներկայացնեն իրաւական այժմեական նշանակութիւն:



Այցելութիւնն ու յայտարարութիւնը ամրագրուած էին նաեւ Հայոց ցեղասպանութեան 100-ամեակի հռչակագիրին մէջ տեղ գտած հետեւեալ բանաձեւումով. «Արժեւորելով... 1920 թուականի Օգոստոսի 10-ի Մերի հաշտութեան պայմանագրի եւ 1920 թուականի նոյեմբերի 22-ի՝ Միացեալ Նահանգների նախագահ Վուոօրօ Ուիլսընի Իրաւարար վճռի դերը եւ նշանակութիւնը Հայոց ցեղասպանութեան հետեւանքների յաղթահարման հարցում»:

Ուրեմն, եթէ Ուիլսընի շիրիմին կատարուած այցելութիւնը եւ ապա ուղղակի յայտարարութիւնը Մերով ճշդուած միացեալ Հայաստանի սահմաններու հայեցակարգային պետական նուիրականացում էր, ապա Հռչակագիրը արդէն Մերի համազգայնացումն էր: Հայաստանի Հանրապետութիւն, Արցախ եւ սփիւռք կը հռչակէին, որ Մերն ու իրաւարար վճիռը արժեւորելի դեր ունին Հայոց ցեղասպանութեան հետեւանքներու յաղթահարման առաջադրանքներու իրականացման մէջ:

Այս կը նշանակէ պարզապէս, որ Հայոց ցեղասպանութեան հետեւանքներուն կը ներառուի նաեւ տարածքային պահանջատիրութիւնը, որուն հիմքը Մերի պայմանագրի հիման վրայ Ուիլսընի ճշդաձ Հայաստանի սահմաններն են, որոնք նաեւ իրաւարար վճիռին նկատմամբ միջազգային օրէնքի ճշդաձ կարգով անբեկանելի են:

Բայց Սեւրը, որուն համար պետական ամենէն բարձր մակարդակով եւս կ'ընդգծուի, որ ունի այժմեական նշանակութիւն, չի վերաբերիր միայն հայութեան: Սեւրը աշխարհամարտէն ետք տարածաշրջանի քարտէսի վերագծում է, եւ Թուրքիոյ մասնատումը, աւելի ճիշդը՝ արուեստական Թուրքիոյ մասնատումը:

Այս առումով ալ այժմեական հնչեղութիւն ունի Սեւրի տրամաբանութեան վերարծարծումը: Ու բնաւ պատահական չէ, որ Էրտողանը այսօր ամենէն թեժ հռետորաբանութեամբ եւ ոգի ի բոհն կը պայքարի Թուրքիան մասնատել ուզող ուժերուն դէմ եւ յականէ անուանէ մատնացոյց կ'ընէ Արեւմուտքն ու յատկապէս Ռաշիսկընը:

Երկու փաստի վերլիշեցում այստեղ օգտակար կրնայ ըլլալ. նախ թրքական մամուլի օրին կատարած հրապարակումները, որոնց համաձայն, օրուան արտաքին գործոց նախարարը եւ այժմու նախագահի թեկնածու Քլիմընի Անգարայի մեջ բանակցութիւններու ընթացքին իր երկրին հայութեան դէպի ծով ելք պարտական ըլլալու նշումը, եւ երկրորդ՝ յառաջիկայ քսան տարուան համար Միացեալ Նահանգներու պաշտպանութեան նախարարութեան վերլուծական բաժնի պատրաստած կանխատեսումներու զեկուցումը, ուր յստակ նշում կար Թուրքիոյ տարածքային ամբողջականութեան խնդրոյ առարկայ դառնալուն՝ ակնարկը ուղղելով Քիւրտիստանի ստեղծման:

Այստեղ աւելի այժմեականութիւն կ'ապահովէ Սեւրը, որ նաեւ սահմանագծած էր ստեղծուելիք Քիւրտիստանը: Այժմեական այն առումով, որ տարածքային հակամարտութեան տեղ չէր ձգեր Սեւրը՝ ճշդելով թէ՛ Հայաստանի եւ թէ՛ Քիւրտիստանի սահմանները: Եւ գիտենք, որ քրտական գործօնը այսօր ի՛նչ հրատապութեամբ կ'ազդէ տարածաշրջանի զինուորաքաղաքական գործընթացներուն վրայ եւ որքա՛ն աջակցութիւն կը ստանայ Արեւմուտքին կողմէ:

Աշխարհաքաղաքական գործընթացները Սեւրի մեջ իշխած զինուորաքաղաքական տրամաբանութեամբ կ'ընթանան: Խնդիրը մեր պատրաստուածութեան հարցն է: Նախագահի յայտարարութիւնները պետականացուցին Սեւրով բանաձեւուած մեր պահանջները: Համահայկական հռչակագիրը համահայկականացուց այդ առաջադրանքը: Աշխարհաքաղաքական ներկայ գործընթացներուն հետ քայլ պահելու եւ պատրաստ ըլլալու համար պատեհ առիթին ճիշդ կողմնորոշուելու եւ առաւել ձեռք ձգելու նպատակով մեզի պէտք են կայուն հայրենիք, անսասան պետականութիւն եւ համայն հայութեան ներուժի նպատակաուղղուած օգտագործում:

Սեւրեան գործընթացներուն պատրաստ ըլլալու, քայլ պահելու եւ պատեհ առիթին առաւել ձեռք ձգելու համար իրաւական պետութիւնը նախապայմանային անհրաժեշտութիւն է:

ԼՈՒՐԵՐ ԳԱՂՈՒԹՆԵՐԷՆ

Մելգոնեան Կրթական Հաստատության 90-Ամեակ



14-21 յուլիսին կարգ մը ձեռնարկներով նշուեցաւ Մելգոնեան կրթական հաստատութեան 90-ամեակը: Այս առիթով կազմակերպուած էր խրախճանք մը՝ վարժարանի շրջափակէն ներս:

Օրուան հանդիսավար մելգոնեանցի Արսինէ Շիրվանեան իր սրտի խօսքին մէջ յոյս յայտնեց, որ 90-ամեակի այս տօնակատարութիւնը առիթ կ'ըլլայ ՄԿՀ-ի առաքելութեան վերանորոգ սկիզբի մը: Օրուան պատգամախօս, վաստակաշատ ուսուցիչ, տնօրէն եւ գեղանկարիչ Վարդան Թաշճեան կոչ ուղղեց, որ հաստատութիւնը բանայ իր դռները, որպէսզի նոր սերունդը եւս յառաջիկայ տարիներուն անցնի այս շէնքերուն ու անմահ բարերարներուն տեսիլքով ստեղծուած հայաբոյր ու հայատրոփ լուսոյ տաճարէն:

Դարձեալ հաստատութեան շրջափակին մէջ տեղի ունեցաւ նաեւ ՄԿՀ ուսուցիչներուն նուիրուած խրախճանք մը: Այս առթիւ օրուան հանդիսավարը փոխանցեց Երուսաղէմի պատրիարք Նուրիան արք. Մանուկեանի օրհնութեան եւ ողջոյնի գիրը: Հանդիսութեան ընթացքին շուրջ 20 հայ եւ յոյն ուսուցիչներ արժանացան բարձր գնահատանքի, որմէ ետք էլոյթ ունեցան մելգոնեանցիներ, որոնք իրենց յուշերուն ընդմէջէն շեշտեցին հաստատութեան դերը եւ անոր վերաբացման անհրաժեշտութիւնը:

Յաջորդ օրերուն շարունակուեցան ընկերային հաւաքոյթներն ու պտոյտները դէպի կղզիին գեղատեսիլ լեռներն ու ծովեզերեայ սքանչելի զբօսավայրերը:

Քարէայի Խորանին Անուանակոչում-Օծումը



Վերջերս Յունաստանի մէջ տեղի ունեցաւ Քարէայի խորանին անուանակոչում-օծումը: Թեմի առաջնորդ Խորէն արք. Տողրամաճեան պատարագի ընթացքին սուրբ թարգմանիչներ Մեսրոպ Մաշտոցի եւ Սահակ Պարթեւ հայրապետի անուններով օծեց Ս. խորանն ու սրբանկարը:

Սրբազանը իր քարոզին մէջ շնորհաւորեց Քոքինիոյ Ս. Յակոբ եկեղեցոյ հովիւ Վահրիճ արք.

Ղարախանեանը՝ օրեր առաջ վարդապետական մասնաւոր իշխանութեան չորս աստիճանները ստանալուն համար, ինչպէս նաեւ Նէոս Քոզմոս-Ֆիքսի եւ շրջանի հովիւ Նարեկ քնյ. Շահինեանը՝ քահանայական ձեռնադրութեան 15-ամեակին առթիւ:

Այնուհետև սրբազան հայրը անդրադարձավ քրիստոնեական հաւատքի եւ հայոց լեզուի միջեւ անքակտելի կապին՝ նշելով Քարեայի մէջ տեղի ունեցած արարողութիւններուն իմաստը եւ կարեւորութիւնը շրջանի հայութեան համար:

Պատարագէն ետք ակումբի բացօթեայ բակին մէջ տեղի ունեցաւ ճաշկերոյթ:

Թաղային խորհուրդի ատենապետ Կոստան Եզեկիէլեան իր խօսքին մէջ շեշտը դրաւ զոյգ օծումներու նշանակութեան վրայ, որ փայլուն էջ մը աւելցուց գաղութի պատմութեան մէջ: Անդրադարձաւ Քարեայի շրջանի հայութեան տարեց սերունդին, որ ապահովեց կալուածը եւ կառուցեց սրահը 50 տարիներ առաջ՝ դիմագրաւելով եւ յաղթահարելով բազմաթիւ դժուարութիւններ:

Նարեկ Քինյ. Շահինեան խօսք առնելով նշեց, որ Ս. Խորանի անուան ընտրութիւնը կատարուեցաւ թեմի երկարամեայ առաջնորդ՝ երջանկայիշատակ Սահակ արք. Այվազեանի իշատակին եւ շնորհակալութիւն յայտնեց բոլորին սոյն նախաձեռնութեան համար:

Մարսէլի Մէջ Ներկայացուեցան ՀայոցՑեղասպանութեան Վաւերագիրներ



21 յուլիսին Մարսէլի Հայկական յիշողութեան հետազօտման եւ արխիւացման կազմակերպութեան գրասենեակին մէջ տեղի ունեցաւ ձեռնարկ:

Կազմակերպութեան հիմնադիր Կարայիս Արթինի դուստր՝ Աստրիդ Արթին Լուսիկեան մանրամասնօրէն ներկայացուց կազմակերպութեան հայանպաստ գործունէութիւնը, արխիւին մէջ պահուող Ցեղասպանութենէն մագապուրծ եղած եւ Մարսէլ ապաստանած հայերուն կողմէ ստեղծուած հայկական առաջին

կազմակերպութիւններուն վերաբերող բազմաթիւ արժէքաւոր փաստաթուղթեր, ֆրանսական կառավարութեան կողմէ ցուցաբերուած օգնութեան տարաբնոյթ փաստաթուղթեր, Ցեղասպանութենէն փրկուածներու լուսանկարներ, մեծ թիւով անձնագիրներու, ծննդեան, ամուսնութեան, գաղթականի, Ֆրանսայի հարաւի հայկական պատրիարքարանին կողմէ տրուած մկրտութեան վկայականներու բնօրինակներ, ինչպէս նաեւ՝ Համաշխարհային Բ. պատերազմին ֆրանսահայերուն մասնակցութեան եւ մինչեւ մեր ժամանակները ընդգրկող բազմաթիւ արժէքաւոր այլ փաստաթուղթեր:

Իր խօսքին մէջ Ֆրանսայի քաղաքաշինութեան, երիտասարդութեան եւ մարմնակրթութեան նախարար Փաթրիք Քաներ կարեւոր նկատեց նման ձեռնարկներու կազմակերպումը ու բարձր գնահատեց կազմակերպութեան գոյութեան նշանակութիւնը եւ կատարած աշխատանքը՝ անգամ մը եւս նշելով Ֆրանսայի Ազգային ժողովին կողմէ վերջերս ընդունուած Հայոց ցեղասպանութեան ժխտողականութիւնը քրեականացնող օրէնքը, վստահեցնելով, որ անիկա հոկտեմբերին պիտի հաստատուի նաեւ ծերակոյտին կողմէ:

Մարսէլի մէջ Հայաստանի հիւպատոս Սամուէլ Լալայեան շնորհակալութիւն յայտնեց նախարարին եւ նահանգապետին՝ Մարսէլի Հայկական յիշողութեան հետազօտման եւ արխիւացման կազմակերպութեան ցուցաբերած հետաքրքրութեան, աջակցութեան եւ զօրակցութեան համար:

ԱՅԼԱԶԱՆ

Ընկերներու Կարեւորութիւնը

Գիտէ՞ք, որ ընկերներու առկայութիւնը իւրայատուկ ազդեցութիւն ունի, անիկա կը բարելաւէ ինքնազգացողութիւնը:

Օքսֆորտ համալսարանի գիտնականներուն կողմէ կատարուած հետազոտութիւն մը ցոյց տուած է, թէ մարդ որքան շատ ընկեր ունենայ, այնքան լաւ կը յաղթահարէ ցաւը:

Հետազոտութիւնը կատարուած է 101 առողջ մարդու վրայ եւ ի յայտ եկած է, որ այն մարդիկը, որոնք մեծ թիւով ընկերներ ունին, անտրոֆինի գործուէնութիւնը աւելի բարձր է անոնց մօտ: Իսկ, անտրոֆինները շատ փոքր մասնիկներ են, որոնք կ'արտադրուին ուղեղին կողմէ, անոնք կը կարգաւորեն ցաւը եւ հաճելի զգացողութիւններ կը պատճառեն:

Հետազոտութեան պատասխանատու Քաթերինա Ճոնսընը եզրափակած է՝ ըսելով, որ անտրոֆինները բնական ցաւազերծիչներ են. անոնք նոյնիսկ մորֆինէն զօրաւոր են, իսկ մեծ թիւով ընկերներ ունեցողները ցաւին աւելի կը տոկան անտրոֆինի բարձր գործունէութեան պատճառով:

8 Բան, Որ Պէտք Զէ Արգիլել Երեխային

-1-

Առանձին Ուտել

Անշուշտ մեր օգնութեամբ երեխան աւելի մաքուր կ'ուտէ եւ չորս կողմը չ'աղտոտեր: Սակայն երեխային համար դժուար բռնելը ինքնին նուաճում է, անոր մօտ կը զարգանայ ֆիզիքական կարողութիւնը եւ ինքնավստահութիւնը:



-2-

Օգնել Մեզի



Մենք յաճախ կը կրկնենք՝ «Տակաւին պզտիկ ես», «Ուշադի՛ր, կը կոտորի», «Զգո՛ւշ, կը թափես... մեր հիւանդագին ուշադրութիւնը աւեր կը գործէ տարիներու վրայ: Պէտք է, որ երեխան ինքզինք կարելոր զգայ, ինչպէս նաեւ լսէ ծնողքին գովասանքները: Փորձենք յաճախ օգնութեան կանչել մեր երեխան եւ յաճախ կրկնենք, որ առանց իրեն գործը յառաջ չ'երթար:

-3-

Ջրաներկով Նկարել

Դժբախտաբար քիչ անգամ առիթ կու տանք երեխաններուն՝ արտայայտել իրենց յոյզերն ու երեւակայութիւնը նկարելու միջոցով: Նոյնիսկ եթէ երեխան ներկեց իր հագուստը կամ սեղանը,

պետք չէ յանդիմանել զինք: Նկարչությունը զգացումները արտայայտելու ամենավառ դրսևորումն է:

-4-

Հագուստը Հանել

Շատ յաճախ երեխաները մեկը միւսի ետեւէն կը հանեն իրենց բաճկոնը, շապիկը... Իսկ մենք անտեղի կ'անհանգստանանք, որ պիտի մսի՝ առանց մտածելու, որ խեղճ երեխան կը տաքնայ: Իսկ կայ իմաստուն խօսք մը, որ կ'ըսէ. «Պէտք չէ բթացնել երեխային մարմինը աւելորդ հագուստով»:



-5-

Ճչալ, Վագվզել Տան Մէջ

Յաճախ ճչալով, տան մէջ թռչկոտելով, վագվզելով՝ երեխաները կ'արտայայտեն իրենց զգացումները: Երեխաներուն համար ասոնք խաղի միջոցներ են, լիցքաթափուելու համար: Այսուհանդերձ, պէտք է անոնց բացատրել, որ նոյն ձեւով չեն կրնար դրսևորուիլ տունէն դուրս կամ ուրիշներու ներկայութեան:

-6-

Դուրսը Խաղալ

Մեզմէ շատեր իրենց երեխային կ'արգիլեն բակ իջնել եւ խաղալ՝ մտածելով, որ կրնայ փորձանք մը պատահիլ կամ վրան-զլուխը աղտոտել:

Երեխան պէտք է խաղայ իրեն հասակակիցներուն հետ, մրցի, կռուի, հաշտուի, այս բոլորը կ'օգնեն ընկերութեան մէջ ինքզինք դրսևորելու եւ անհատականութիւնը կերտելու:

-7-

Ջուրով Խաղալ

Ջուրով խաղալը երեխաներուն ամենասիրելի զբաղումներէն է: Իսկ մենք յաճախ կ'արգիլենք եւ կը զրկենք այդ մեծ հաճոյքէն: Պէտք է պարբերաբար անոնց արտօնենք ցնցուղով ծաղիկները ջրել, լոգարանին մէջ խաղալ, շուկայէն բերուած քանի մը խնձոր կամ լոլիկ լուալ...

-8-

Մեփական Կարծիքը Արտայայտել

Երեխան ամբողջական անձ է եւ իրաւունք ունի արտայայտելու իր սեփական միտքերն ու կարծիքը: Մենք յաճախ անգիտակցաբար կը կաղապարենք մեր երեխաները՝ անոնց

պարտադրելով մեր տեսակետները: Ուշադիր ըլլանք եւ չճգմենք մեր երեխաներուն անհատականութիւնը եւ յարգենք անոնց կարծիքը:

«Էփրլ»-ի Նորութիւնը



«ԷՓԸԼ» ընկերութիւնը կը յաջողի «ԱյՖոն» սմարթֆոններուն մէջ սարք մը եւս աւելցնել ՄԻՄ քարտի համար: Այդուհանդերձ, տակաւին յայտնի չէ, թէ ո՞ր տեսակներուն մէջ պիտի յայտնուին նորարարութիւնները: Շատ հաւանաբար այդ նորարարութիւնը չի վերաբերիր «ԱյՖոն 7»-ին:

Անհրաժեշտ է նկատի առնել, որ երկրորդ քարտի համար սլոթի յայտնուիլը կը պահանջէ որոշ արհեստագիտական փոփոխութիւն՝ ընդունիչ եւ հաղորդիչ յատուկ սարքեր:

«Էփրլ»-ը Գնեց «Թուրի» Ընկերութիւնը

Արհեստական իմացութեան մշակումով զբաղող «Թուրի» ընկերութիւնը այժմ դարձած է «Էփրլ»-ի սեփականութիւնը: Գործարքի գումարը կազմած է մօտ 200 միլիոն տոլար:

«Թուրի» սթարթափը կ'օգնէ մշակողներուն՝ ստեղծելու ծրագրային ապահովում եւ ծառայութիւններ, որոնց շնորհիւ արհեստական իմացութիւնը կրնայ ինքնիշխան ուսուցանել: Բացի ատկէ, սթարթափի համակարգերու շնորհիւ՝ ընկերութիւնը կը յայտնաբերէ խաբէութիւնները եւ վերլուծել սպառողներու վարքը: Գործարքի միջոցով «Էփրլ» կ'ուզէ արտօնեալ դիրք գրաւել արհեստական իմացութեան մարզին մէջ: «Թուրի»-ի կրնայ համարկուիլ «Միրի» ձայնային յաւելումածին՝ որոշելու համար համակարգիչի եւ մարդու փոխադարձ գործողութիւններու նոր ուղիներ:

«Ինսթակրամ»-ի Նոր Կարելիութիւնները

«Ինսթակրամ»-ը մեկնաբանութիւնները վերահսկելու ընդլայնուած կարելիութիւններ կը տրամադրէ:

Օգտագործողները իրենց էջերուն մէջ այժմ կրնան «ձեռքով» ջնջել անցանկալի արտայայտութիւնները, սակայն նման ձեւը շարք մը թերութիւններ ունի: «Ինսթակրամ»-ի մասնագետները կը մտադրեն մեկնաբանութիւնները վերահսկելու համար լրացուցիչ գործիք ստեղծել, որ թոյլ կու տայ որոշ բառեր, եզրեր եւ բառակապակցութիւններ սեւ ցուցակի մէջ ընդգրկելու: Եթէ լուսանկարին տակ գրուած մեկնաբանութիւնը պարունակէ անցանկալի բառեր, համակարգը ինքնաբերաբար կը ջնջէ ատիկա: Բացի ատկէ, օգտագործողները շուտով կը կարենան անջատել իրենց ելեկտրոնային հասցէին՝ մեկնաբանութիւններ եւ արձագանգներ ուղղակի ստանալու կարելիութիւնը:

www.armenianprelacykw.com